

Stundir til valgreina verða þó aldrei færri en 4 í skólahverfi sem hefur 10. bekk.

c) Stundir til reglubundins hópnáms í skólasafni undir leiðsögn kennara. Hverjum skóla er reiknuð ein vikustund á hverja 30 nemendur í 6. - 10. bekk.

11. gr.

Við ákvörðun fjölda kennslustunda sem ríkissjóður greiðir samkvæmt reglum þessum er miðað við nemendafjölda í einstökum bekkjardeildum sem hér segir:

Í 1. og 2. bekk 22 nemendur.

Í 3. - 10. bekk 28 nemendur.

Fræðslustjóri getur þegar sérstaklega stendur á, ákveðið hækkun á þessum viðmiðunar-tölum um allt að 2 nemendur í bekk þannig að hámarksfjöldi í 1. og 2. bekk getur orðið 24 og í 3. - 10. bekk 30 nemendur.

Í fámennum skólum þar sem aldursflokkar í 1. - 8. bekk eru saman í deildum skal miðað við að nemendur í bekkjardeild séu ekki fleiri en hér segir:

8 nem. ef aldursflokkar eru fleiri en fjórir

12 nem. ef aldursflokkar eru fjórir

17 nem. ef aldursflokkar eru þrír

22 nemendur ef aldursflokkar eru tveir.

Í 9. og 10. bekk skal miða við að deildir séu ekki færri en aldursflokkar þeir sem sækja þessa bekk skólans. Til þess að 9. og 10. bekk verði haldið uppi í skólahverfi mega nemendur í þessum deildum þó ekki vera færri en 12 að meðaltali, nema að fenginni heimild menntamála-ráðuneytisins.

12. gr.

Í fámennum skólum þar sem nemendur í 1. - 8. bekk eru saman í deildum, skal miða við að heildarstundafjöldi og innbyrðis hlutföll milli námsgreina séu sem næst því sem segir í 2. og 3. gr.

13. gr.

Kennsluáætlanir skóla samkvæmt reglum þessum skulu staðfestar af fræðslustjóra áður en til framkvæmda kemur.

Reykjavík, 13. apríl 1992.

Ólafur G. Einarsson.

Sólrún Jensdóttir.

REGLUGERÐ

um humarveiðar 1992.

1. gr.

Úthlutun aflamarks í humri á vertíðinni 1992 skal miðast við að heildarhumaraflí verði 2065 lestir miðað við heilan humar sbr. þó 3. gr.

2. gr.

Bátum, sem aflahlutdeild hafa í humri skv. lögum nr. 38/1990, um stjórn fiskveiða er heimilt að stunda humarveiðar við Suður- og Suðvesturland frá og með 21. maí til og með 15. ágúst 1992. Veðisvæði markast að austan af línu, sem dregin er réttvísandi í suðaustur frá Papey og að vestan af línu sem dregin er réttvísandi í vestur frá Malarrifsvita.

Óheimilt er að stunda veiðar á grynna vatni en 55 föðmum.

3. gr.

Við útreikning á humaraflamarki þegar humar er slitinn um borð í fiskiskipi verður ekki tekinn með þriðji stærðarflokkur þ.e. humarhalar sem eru 6 g til 10 g að þyngd, enda fari hlutfall þess stærðaflokks ekki yfir 5% af úthlutuðu humaraflamarki bátsins á vertíðinni.

4. gr.

Lágmarksstærð möskva í humarvörpu skal vera 80 mm. Óheimilt er að klæða pokann hlífðarneti að ofan og ennfremur er óheimilt að nota tvöfaldan poka.

Um frekari reglur um möskvastærðir og mælingar möskva vísast til reglugerðar nr. 38/1991, um möskvastærðir í togvörpum, möskvamæla og mæliaðferðir.

5. gr.

Þegar humarveiðar eru stundaðar er óheimilt að hafa önnur veiðarfæri en humarvörpu um borð í veiðiskipinu.

6. gr.

Ílát undir humar um borð í veiðiskipi skulu greinilega merkt skipinu og skal tilgreint á því hvenær humar er veiddur.

Um meðferð afla um borð í veiðiskipi vísast til ákvæða reglugerðar nr. 55/1970, um eftirlit og mat á ferskum fiski o.fl.

7. gr.

Humarafla skal landað til vinnslu hjá viðurkenndri vinnslustöð hér á landi, sem hefur heimild til vigtunar humars sbr. reglugerð nr. 489/1990.

Óheimilt er að frysta humar um borð í veiðiskipi.

8. gr.

Óheimilt er að stunda botnfiskveiðar með humarvörpu. Verði um óeðlilega fiskveiði að ræða að mati ráðuneytisins þannig að aflaverðmæti botnfisksins sé svipað eða meira en verðmæti humarafla í tveimur samfelldum veiðiferðum er ráðuneytinu heimilt að svipta viðkomandi skip heimild til að stunda humarveiðar.

9. gr.

Skylt er að hirða allan humar og fiskafla sem fiskiskip fær í humarvörpu og reiknast fiskafla til botnfiskaflamarks skipsins. Verði aðili uppvís að því að henda humri eða fiski frá fiskiskipi varðar það tafarlausri sviptingu heimildar til humarveiða. Skal botnfiski haldið aðgreindum eftir tegundum og veginn á löndunarstað skv. ákvæðum reglugerðar nr. 489/1990, um vigtun sjávarafla.

10. gr.

Heimilt er að flytja allt að 10% af aflamarki humars frá yfirstandandi fiskveiðiári til þess næsta.

Um flutning aflamarks í humri milli skipa gilda ákvæði 12. gr. laga nr. 38/1990, um stjórn fiskveiða.

11. gr.

Útgerðum skipa er skylt að senda sjávarútvegsráðuneytinu mánaðarlega skriflegar upplýsingar um afla á eyðublöðum sem ráðuneytið leggur til. Þá er skipstjórum skylt að halda sérstakar afladagbækur sem Hafrannsóknastofnunin leggur til og skal upplýsingum skilað mánaðarlega til stofnunarinnar. Vanskil á skýrslum samkvæmt þessari málsgrein varða sviptingu heimildar til humarveiða án frekari viðvörunar.

12. gr.

Brot á reglugerð þessari varða viðurlögum skv. 19. gr. laga nr. 38 15. maí 1990, um stjórn fiskveiða. Getur ráðuneytið m.a. svipt skip heimild til veiða í tiltekinn tíma vegna brota á ákvæðum þessarar reglugerðar.

13. gr.

Reglugerð þessi er sett samkvæmt ákvæðum laga nr. 38 15. maí 1990 um stjórn fiskveiða til þess að öðlast þegar gildi og birtist til eftirbreytni öllum þeim, sem hlut eiga að máli.

Sjávarútvegsráðuneytið, 21. apríl 1992.

Þorsteinn Pálsson.

Árni Kolbeinsson.

REGLUGERÐ

um endurskoðun vaxtakjara af lánum Byggingarsjóðs verkamanna.

I. KAFLI

Endurskoðun vaxtakjara sex árum frá lántöku.

1. gr.

Reglugerð þessi tekur til lána úr Byggingarsjóði verkamanna sem tekin hafa verið til kaupa á félagslegum íbúðum frá því er lög nr. 60/1984 tóku gildi þann 1. júlí 1984.

Endurskoðun vaxta skal eiga sér stað 6 árum frá undirritun kaupsamnings eða afhendingardegis íbúðar sem er fyrsti vaxtadagur lánsins.

2. gr.

Húsnæðisstofnun ríkisins skal kanna hvort hagar lántakanda hafi vænkast með eftirfarandi hætti frá því lán var tekið sex árum áður.

- a. Eignir hafi aukist svo að þær hafi farið yfir þau mörk sem gilda samkvæmt a-lið 1. mgr. 80. gr. laganna og 3. gr. reglugerðar þessarar.
- b. Tekjur hafi aukist svo að þær hafi farið yfir þau mörk sem gilda samkvæmt b - lið 1. mgr. 80. gr. laganna og 4. gr. reglugerðar þessarar.

3. gr.

Með eignum, sbr. a-lið 2. gr., er átt við þann mismun sem er á heildareignum og heildarskuldum lántakanda samkvæmt síðasta skattframtali. Eignamarkið er 1.8 millj. kr. pr. 1. janúar 1992. Eignamark þetta breytist ársfjórðungslega miðað við byggingarvísitölu.

4. gr.

Með tekjum, sbr. b-lið 2. gr., er átt við meðaltekjur undanfarin þrjú ár áður en endurskoðun vaxta fer fram og miðast við tekjuskattstofn samkvæmt skattskýrslum. Tekjumarkið á árinu 1991, er kr. 1. 343.431 fyrir einstakling, kr. 1.679.288 fyrir hjón og kr. 122.395 fyrir hvert barn.